

Misi sukarelawan YSS ke Laos berjaya

KUALA LUMPUR 1 Sept. - Misi sukarelawan Yayasan Sukarelawan Siswa (YSS) selama 15 hari di Vientiane, Laos melibatkan lima mahasiswa universiti tempatan mampu memberi nilai tambah dalam melahirkan modal insan berkualiti.

Pengerusi YSS Malaysia, Datuk Zuraidah Atan berkata, misi tersebut telah memberi manfaat sangat besar kepada peserta misi itu meningkatkan ilmu, kemahiran dan pengalaman baru terutama berkaitan aspek membuat keputusan, berfikir secara kritis, analitikal dan memupuk semangat bekerja dalam satu pasukan.

Beliau turut melahirkan rasa bangga dan gembira dengan komitmen sukarelawan yang bersungguh-sungguh menjalani latihan, bimbingan dan aktiviti sepanjang dua minggu minggu tanpa henti.

"Misi sukarelawan ini sangat membantu para mahasiswa untuk berfungsi dan bersaing dalam dunia pekerjaan yang diperlukan oleh sektor korporat hari ini.

"Ini secara langsung membantu negara dan agenda Transformasi Pendidikan Negara bagi melahirkan ma-



ZURAIDAH Atan (tengah) bergambar kenangan bersama para sukarelawan dan pengurusan National University of Laos, di Vientiane, Laos, baru-baru ini.

hasiswa yang bersifat holistik, berdaya maju dan berkualiti ke arah kebolehpasaran graduan yang tinggi," katanya dalam kenyataan di sini hari ini.

Sementara itu, Zuraidah memberitahu, sepanjang misi tersebut berlangsung selama 15 hari yang

tamat semalam, sukarelawan Malaysia bersama lima rakan sukarelawan daripada National University of Laos (NUOL) berjaya memberi impak yang signifikan kepada diri masing-masing, para pelajar, guru dan komuniti setempat.

"Atas kejayaan misi sulung ini, YSS telah berhasrat melebarkan misi sukarelawan ke Luang Prabang pada masa akan datang," jelasnya.

Sementara itu, Pengarah Bahagian Antarabangsa NUOL yang juga merupakan bekas graduan Universiti

Putra Malaysia (UPM), Keomanivong Phimmasene memberitahu, jalinan kerjasama dan interaksi yang baik antara siswa Malaysia dan Laos sudah pasti memberi impak positif jalinan kerjasama dalam pelbagai bidang antara kedua-dua negara.